

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 2350 del 30/08/2025

Manà fora su Trentino Tv l program l vegn endrezà dal Comun General de Fascia

“Pedies”: per en sabeda ai 30 de aost vegn fora la puntata #501 del program ladin per la televizion

[Ladino] Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata n. 501. I argomenc de chesta setemèna.

Gran festa a Col per i 20 egn del Istitut cultural ladin Cesa de Jan, nasciù per voler di ladins de Fodom, Col e Ampez, anchecondi sot Belun, che no i vel desmentièr sia reijes e si leames storics e identitères. Raprejentanc del mond politich e culturèl del Sela à tout pèrt al event per esser apede ai jormegn de Soramont te chest di emportant dal pont de veduda storich, culturèl e identitèr.

En jebia ai 21 de aost, te la bela cornisc del Mèsc Agua Biencia a Pera, i raprejentanc de la firmes di impianc portamont de Fascia à endrezà n moment dal gran segnificat simbolich: na scontrèda coi raprejentanc de la istituzions per se confrontèr, portèr dant la neves e per ge sporjer n bel don al Procurador Edoardo Felicetti, simbol di 50 egn de Dolomiti Superski, na realtà che te duc chisc egn à desmostrà che la forza la vegn dal grop.

Tinultima, te chesta puntata vegn portà dant n nef apuntament de la rubrica “Lesc: cuchèr te ogne piz e cianton”. Raffaele Rizzi, enrescidor de storia locala, ne conta de Fontanac, na piccola vila spartida anter Fontanac de sora e de sot, con gran curiositèdes. Se pel troèr l inom de Fontanac “Locum Vundenates in Nevis” tel prum e più antich scrit che reiona de Fascia, che l é del 1143.

I reports de chesta setemèna, enjigné da Riccardo Zanoner i vegn porté dant co la ousc de Angela Pederiva.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su Trentino Tv – canal 10 Prov. de TN- vigni sabeda da les 18.00 (sie da sera), de domenia da les 13.30 (mesa la does domesdi) e de lunesc da les 11.30 (mesa les doudesc).

L program ades l va fora ence sun AltoAdige TV – canal 11 de BZ - vigni domenia da les 18.00 (sie da sera).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

opuramenter se pel veder i servijes un a un su la piata Facebook de TV Ladina

<https://www.facebook.com/TelevizionLadina>

Traduzion di Servijes Linguistics e Culturèl del Comun general de Fascia

(cdt)